

四庫全書

集部

欽定四庫全書

集部

鳳池吟稿卷二

詳校官中書臣呂光復

中書臣劉源溥覆勘

總校官中書臣朱 鈐

校對官中書臣牛 稔文

謄錄監生臣沈世玫

欽定四庫全書

集部六

鳳池吟稿

別集類五

明

提要

臣等謹案鳳池吟稿十卷明汪廣洋撰廣洋字朝宗高郵人流寓太平太祖渡江召為元帥府令史歷官中書右丞封忠勤伯尋進右丞相以與胡惟庸同位不能發其姦狀坐貶廣東于中途賜死事蹟具明史本傳廣洋少

師余闕淹通經史善篆隸詩格清剛典重一
洗元人纖媚之習朱彞尊嘗摘其五言中之
平沙誰戲馬落日自登臺湖水當門落松雲
傍枕浮懷人當永夜看月上疎桐對客開春
酒當門掃落花天垂芳草地漁唱夕陽村等
句凡數十聯以為可入唐人主客圖靜居北
郭猶當遜之毋論孟載其推重之如此而明
代論詩家流派者多未之及蓋當時為宋濂

諸人盛名所掩故世不甚稱然觀其遺作究不愧一代開國之音也乾隆四十三年九月恭校上

總纂官臣紀昀臣陸錫熊臣孫士毅

總校官臣陸費墀

鳳池吟稿原序

昔人之論文者曰有山林之文有臺閣之文山林之文其氣枯以槁臺閣之文其氣麗以雄豈惟天之降才爾殊也亦以所居之地不同故其發於言詞之或異耳濂常以此而求諸家之詩其見於山林者無非風雲月露之形花木虫魚之玩山川原隰之勝而已然其情曲以暢故其音也渺以幽若夫處臺閣則不然覽乎城闕宮觀之壯典章文物之懿甲兵卒乘之雄華夷會同之盛

所以恢廓其心胸踔厲其志氣者無不厚也無不碩也故不發則已發則其音淳龐而雍容鏗鉤而鏜鞳甚矣哉所居之移人乎今觀中書右丞汪公之詩益信其說為必然者矣公以絕人之資博極羣書素善屬文而尤喜攻詩當皇上龍飛之時仗劍相從東征西伐多以戎行故其詩震盪超越如鐵騎馳突而旗纛翩翩與之後先及其治定功成海宇敕寧公則出持節鉞鎮安藩方入坐朝堂弼宣政化故其詩典雅尊嚴類喬嶽雄峙而

羣峰左右如揖如趨此無他氣與時值化隨心移亦其
勢之所宜也然而興王之運至音斯完有如公者受丞
弼之任吟咏所及無非可以宣教化而弼皇猷有物有
則民彝甚大非止昔人所謂臺閣之文而已而山林之
下誦公之詩者莫不被其霑溉之澤化枯槁而為豐腴
矣雖然詩之體有三曰風曰雅曰頌而已風則里巷歌
謠之辭多出於氓隸婦女之手彷彿有類于山林雅頌
之製則施之於朝會施之於燕享非公卿大夫不足以

為其近於臺閣乎輶軒之使弗設而托之於國風者若
無所用之皇上方垂意禮樂之事豈不有撰為雅頌以
為盛典乎濂蓋有望於公他日與鹿鳴駟牡諸作並傳
不朽者非公之詩而誰哉濂也不敏受公之知十有一
年故竊序其作者之意于篇首燕類之辭要不足為公
詩之重輕也公名某乃上之所賜其字則朝宗也淮南
人洪武三年四月二十一日金華宋濂序

欽定四庫全書

鳳池吟稿卷一

明 汪廣洋 撰

五言古體

大祀

維皇建有極庚戌值時康二氣迭敷宣允若協雨暘季
秋成物際報祀禮有常掃地事明薦穹廬列兩行鼓
鐘宿在懸玉帛燦成筐陶匏湛醴齊大登具牛羊匪侈
禮物豐貴在誠意將今夕乃佳夕天高露氣涼微雲散

晝靄衆星羅縱橫濟濟百執事念茲靡或忘金門少馬
闕和鸞鳴聲揚旂常紛左右燔燎彌耿光宸旒儼祇肅
對越位中央八音倡律呂佾舞節趨蹌所舉靡不修所
及靡不臧川嶽永流峙風雲儵低昂神靈符盱響鑒假
達羶薌錫福何簡簡降福何穰穰既灌隸雍徹精誠合
一堂願祈億萬年禴祀及蒸嘗載歌周頌篇庸擬被樂
章

大饗

諸侯謹述職方伯敬來同後世尚斯典往古有遺風維
茲獻歲始大鈞妙化工川泳雲飛間罔不被薰融至尊
垂衣裳雋髦蔚景從土宇日已廣民物日已豐匪文莫
附遠匪武孰成功不有勸賚美恩意何由通乃命行大
饗禮數極雍雍三公相左右百辟叙西東祥飈臨寧來
旭日當天紅佳肴薦修脯旨酒酌春缸舞干何子子擊
鼓何皦皦麗曲被朱絃清磬和考鐘尊卑同一謹遭遇
靡易逢豈惟決和樂厚在肅儀容自昔周室時君臣期

令終頌歌詠覓鷺錫予賦彤弓其慶何綿綿其音何泯
泯所以億萬載慨念思無窮小臣奏雅章稽首對九重

別知己

北風吹征帆飄飄西南馳山川聿修阻霜露忽淒其今
我遠行邁豈不念歲時歲時豈不念簡書良在茲翩彼
晨飛鴻翱翔亦何之感我同袍友感感懷化離化離雖
可懷觴酒當載持各言崇令德金石以為期

明發

膏車待明發，逶迤上河梁。親朋羅祖餞，冠蓋燦成章。遲
予良繾綣，都門猶在望。條風被原隰，春日當載陽。鳴鳶
餘好音，雜葩紛衆芳。魴魚始登薦，旨酒屢充觴。既醉復
贖言，欲去故徬徨。維周仲山甫，王命慎所將。夙夜無有
懈，庶幾終允臧。斯言啟深省，勗哉何日忘。

君子慎所擇

君子慎所擇，結交當結心。苟不易所守，憂患實相任。在
昔管鮑氏，友愛殊獨深。意氣一見許，乃能輕萬金。桓桓

松與栢托根泰山陰
玄冬冰霰集鬱鬱自成林
維澤有蘭莖
苾芬思可紉
豈比榛枿叢凋瘁
易相尋所以君子
交愈久愈足
欽吐詞罄肝膽
炯然同照臨
夫何庸俗徒
徇習等浮沈
茲意邈難寫
浩歌彈素琴

朝日何瞳瞳

朝日何瞳瞳
澄輝麗華嶼
衆鳥欣已集
交交互鳴語
緬懷當來游
旌麾戒炎暑
樓船渡烟霧
弭節章之渚
章渚隘卑濕
夕氣暝蒸雨
偃仰憑危閣
何以浣襟宇
適茲涼

飈至高蟬振鳴羽清芬散川原微瀾動浦澈誰云披景
光寧不感時序獨立暢余懷馳思更延佇

對菊答友生

江郭秋已闌風氣日餘肅虫鳴徧衰草音響亦何促閒
處積素抱無以娛心目喜君林壑彥遺我柴桑菊把玩
開晴軒芳枝動幽馥靡靡含朝暉踈疎間寒綠併罨置
美酒相命屢往復吐詞不在繁累觴須再續寧云乏珍
羞聊因薦芳藪持此宣冲襟愛之比良玉掇英知永年

殷勤為君祝

壯游奉東諸閣老

壯游吳楚外揚舲溯天風
名山浮紫翠大江走蛟龍
歷覽思超越毛骨生冰雪
脫巾澆清湍舉手弄明月
明月懸青銅古人難再逢
牛渚委陳迹峩眉斂愁容
九華舞僂僂窺見滄溟底
小孤立亭亭徘徊女蘿裏
流宕番湖湄峰巒愈出奇
幽深構樓閣峭絕挂猿獼
放意自陶寫援筆灑秋泚
神怪連宵寘魚鳥覺欣喜
路逢丹丘生來

自赤霞城麻姑後飛鴛子晉迭吹笙湖光潑灑開雲壓
蒲萄綠狂引黃金壘笑歌紫芝曲左蠡素相得當湖忽
見迎揚瀾平一掌中有龜鼉行振衣板鵲巢桐蘿踐苔
石厓氣凌空青松花墜階白舉首匡廬下調笑烟霞間
屢會復屢往今往幾時還叢蘭被路蹊芳草紫澗谷長
颺和鳴鶴迸泉驚飲鹿須臾面五老邀我山之陽授我
長生訣兼遺洞玄章問我從東來迢遙泛鯨波三山得
無恙十洲近如何傍招廣成子俯挹山中老鯉魚躍大

江鷓鴣下天治待以青精飯酌以白玉漿乖龍左耳潤
吠犬靈苗香渴烏漸斂翼拭目增晚碧朵朵金芙蓉憑
虛落胸臆西南挺奇異江湖馳偉觀披披古蘭若丹靈
耀嶺岬嘗聞遠法師堅坐東林下還許陶淵明共結白
蓮社又聞李太白酷愛香爐峯長安却塵鞅欲歸巢雲
松往事既云遠顧我復來此濯泉坐樹陰下洗巢由耳
綠髮雙青瞳採芳留我行我行欲不行月高猿夜聲西
山招我遊明日過湖水笑隔南浦雲遙謝數君子

奉旨講賓之初筵并序

臣廣洋忝在諫垣初上銳意於圖治蒐武餘
暇延訪遺老從容賜坐討論古今鑒觀興廢
兢兢業業惟恐有弗迨與夏禹惜寸陰殷湯
日新其德周文望道未見之意實同符而合
輒也頃者博士臣梁貞用古詩三百十一篇
輯成巨帙進供睿覽原之秦先生良卿周先
生侍坐上躬親檢閱以賓之初筵一詩命臣

廣洋直言講解顧念學問迂疎曷足發揚古
作者之微旨據經引註敬為演繹上亦為之
興感乃曰衛武公一諸侯也九十衰耄尚能
令人作詩自儆復令人朝夕諷詠期於不忘
矧今以可為之年當有為之日何不激昂龜
勉耶仍命臣廣洋繕寫數十本頒賜文武大
臣俾揭於高堂欲常接乎目應乎心以古賢
侯為自期視武公初意尤昭著而浹洽矣竊

惟方今文武並興賢哲彙進其間老於文學
者或皓首一經朝溫暮習行詠坐思似若有
所得也然片言隻字之奧猶不能不窒於懷
况當經緯萬幾感悟一語渙然冰釋發為昭
代美事其濬哲文明得非天縱者與臣廣洋
適際斯時敢不拜手稽首敷陳萬一顯俟後
日風雅君子於是乎書

維周臨九有運祚何其昌本支既蕃衍道化亦流行粵

若衛武公展也令譽彰耄年儆畏深固敢貽怠荒反躬
益淬厲托言敷雅章朝夕冀相接寤寐耿弗忘爰思庸
為詩燕饗禮極臧苟不究終始曷能鬯抑揚時維肆筵
日冠蓋來煌煌秩然賓主分蔚然鸞鳳翔俎豆陳左右
肴核薦馨香旅酬倡謹虞八音迭鏗鏘惟云在和樂毋
以踰太康請觀嘉會初靡不罄所饗史臣相我右監官
佐我傍容止慎有節語言矜有常終希蹈桀黷勿為德
之涼所以古君子勉勉念自強迨茲禮物既寧莫懷所

往三爵稍不識主賓實傍徨我我弁傾側傴僂舞趨踰
喧笑四座起謔浪殊未央遽俾出童殺而為中心傷所
以古君子兢兢恒自將矧今創造始風雲連八方凡我
百執事豈不負責望般樂誠急傲流連乃荒亡屏翰既
有托啟居在不遑至尊宵旰間文武翕弛張攬轡奠民
庶駐車問賢良匱抽金石封取鑿法殷湯上以繼神聖
下以息搶攘芻蕘亦何幸培植紆寵光焉知作者意諷
詠悉其詳據經掇訓詁庶幾於佛彷天容儼垂霽諸老

賦顯印拜手稽首書愚衷見毫芒彤庭扇微颺白楮浮
清霜晴槐轉午影堯日正舒長

書泣麟圖後

麒麟素不出出則世道寅世道久不寅爾出胡不辰爾
出胡不辰吁嗟乎麒麟麒麟果何物允矣獸之仁天性
實賦予信靡豢與馴有角固抵物抵物物不隕有趾固
踐物踐物物亦伸牛羊匪爾類麋鹿匪爾鄰誰俾脫於野
大駘魯野民野民疑為怪不以爾為珍苦罹物所戕棄

捐道路塵皇皇宣尼父道逢古城堙城堙天四垂蒼茫
愁殺人徘徊念獨往淒風吹日曛捫心靜躊躇慟哭非
爾聞野民反貽誚孰與究其因吁嗟麟之厄此道何由
信夫何姬轍東王綱日以淪春秋二百年托之南面尊
辭嚴慎予奪勗哉萬世馴亂臣及賊子趺足走逡巡不
有宣尼父誰將息紛紜吁嗟麟之死此道何復云慨念
周室初君聖臣亦賢鳳鳥下千仞皇風蕩極垠騶虞美
庶物品類實蕃殷圖以道義方培以仁義根斯民幸弗

隆愈久愈不泯迨茲日益遠世道遂莫振所以宣尼父
感歎難為言披圖百拜餘識此眉目真靡敢事綺麗聊
以慰斯文

省中秋夕

流火遵西陸新秋屆在茲羣英罷趨謁夕漏滴多時肅
肅繁露降飄飄涼風吹蘭蕤翳金井梧葉下彤墀徙倚
待清問張燈照薄帷六經浩茫海悠悠遺所思

奉簡兩司諸公

夙昔被寵遇寢興恒不違况膺喉舌司寧不懷慨慷雞
鳴奮臂起顛倒攬衣裳謨謀慮未周諮詢患未詳興言
策我馬載月冒嚴霜予以思補報予以思贊襄顧瞻銀
臺門衆星羅耿光長松結翠蓋疊閣峙鸞翔皇皇多士
集孰不希令望如麟瑞郊藪如鳳出朝陽舒徐大廷下
珂珮鏘琳琅讜論備原委灑盡各有章方茲勵圖治昭
哉崇俊良彌綸貴有道慚愧非我長憂與事交至惕然
熱中腸展也古君子示我以周行一言勤在公載言歆

對揚聲教由此宣風氣由此張用是慎黽勉稽首終激
昂勿為甘素殮中心徒永傷

用王璠登山詩韻

層臺凌空青盤距亦非隘偶茲寄玄想高朗足所快繁
條翳青陰雙林儼相滯靈齧峙雲中踈鐘起天外于以
干景精于以聆梵唄焉知瀕洞間適與意相會在在山
之陽凝颺振行旆

月出湖水明雲澄楚山碧涼颺動地來蒼茫思何極遐

哉金銀闕臺構越千尺彤霞湛昭回白羽仰飛歷重遊
感遲莫勝賞諧今昔云胡穹壤中而為物所役眷茲澹
夷猶得酒聊自適

習靜齋為鎰秀才賦

鎰古
劉字

蜂蟻竟喧雜營營胡為生蘭苔媚景光靡靡安足榮若
人達至理冲然彌自貞汎覽頽仰間端居念慮清終然
得所適放歌南山行南山佳遊遨亦足暢幽情涼風吹
衣裳流泉濯冠纓樂哉忘歲年焉知外物嬰

送叅政蔡思賢奉使西蜀

酌君白玉杯贈君黃金鞭君當遠行邁聽我歌短篇維
蜀控西土相去何綿綿銅梁倚白日巫峽橫青天周原
開沃壤萬壑成奔川文翁昔領校風俗為之遷武侯繼
秉國綱紀乃秩然由來蜀故老念之如在焉君今肅將
命禮義重所專冠蓋宛相遠照耀江之邊澄江上新鯉
碧樹當離筵君行壯遠別慷慨薄雲烟茲事信足美高
誼良可宣聊因寫餘興浩歌秋風前

觀種蔬人

種蔬不滿畦畦大蔬亦長瓜瓠芩修條韭薤被腴壤耘
耔勵昕夕灌溉益培養新苗抽露莖巨葉覆雲掌生意
日已敷闢土日已廣溝澮漸疏豁螟螣在袪攘靡靡充
盤盂稍稍積餅盎乃知天地間服力足有仰苟不苦心
志胡能奉餘饗為爾罄空言聊以寄幽想

題梁氏偕老詩卷

寶應梁氏博雅人也與其妻洪氏俱年八十

餘一日同死鄉里嘆羨求為賦詩

在昔有夫婦隱居隨巖巔饑食岩中芝渴飲岩下泉
朝化雙鶴飄飄上九天蹇予好事者覽茲懷古先邇來
安宜生敘述梁氏賢交游崇信義舉指節周旋雍容家
室間琴瑟協鳴絃賓客敬相待子孫羅其前秋霜照白
髮消遙各忘年世慮素超越一日同棄捐鄉里悉驚羨
詩賦多流傳我思人之死渺如風中烟偕歡尚莫遂偕
老難必然王國道化行仁風被八埏俾民生無虞俾民

死獲全我歌汝墳章再賡偕老篇一為梁所重一為聖
所宣

送陳克明陪師進澗與孫伯融各賦五言贈別
分得蛟龍得雲雨五韻

轟霆撼鞞鼓飛霧揚旌旄元戎事西澗大饗行南郊羣
舞士氣作拔劍揮長蛟

柳色何依依鳥鳴何嗷嗷陳師諒及時觀者為改容引
領待神捷歸騎看游龍

謝安本偉人樂毅乃豪客出處貴有時論議重有益君
看汗竹間動庸匪輕得

武林古都會冠蓋游續紛念此喪亂中孰不思汝墳願
言崇慰止庶以集如雲

回風來樹顛旭日麗江渚臨別贈長歌歌竟暫容與君
知大旱秋晷晷望霖雨

明發

迂拙本所尚謬膺時見知高車踵華要豈不日求思徂

春歷西垣托以國藩維茲辰遡東魯重以民命司撫已
揆中素憂感積如絲簡書遽臨門我何敢遲遲僕夫具
行裝明發大江湄朋情念遠別臨餞難為辭好風吹楊
舟旭日麗彩旗流波渺東注緬懷當若斯聖明極高厚
踈淺諒何為

遡沙河

輕舟遡河流信宿忘少暇委蛇遵大堤荏苒歷初夏晴
光汎流沫川漲益湍瀉游子念遠行假寐待明夜方經

鎬渡灣條過鶴丘下嚶嚶山鳥鳴的的水花謝愛此堤
上柳緒風一披洒樵師力張帆中流去如馬孤烟隔渚
生偶見捕魚者相顧不得言長歌恣陶寫

宿慈雲寺

悟生本無象所設誠幻境覽茲古蘭若稍獨眷脩整金
碧開焜煌莊嚴麗高迴開士彌天秀見趣一何穎跣趺
暢鴻音種種得要領我昔聞馬祖說法最馳騁空青雨花
落鉢孟叅龍醒迨今古道場屹屹萬山頂信美二三子

冲素抱孤耿于馬憩微涼兼遂扣磬肯掃地燃妙香汲
泉試竒茗擴哉聞未聞融液在俄頃長松掛寶月坐見
浮圖影蝠出簷溜深蛩鳴砌陰冷宵分始就寐怵然發

幽省

馬祖寺在寺東南前有出水寺
泉極清冽傳云自惠山泉來

鳳池吟稿卷一

欽定四庫全書

鳳池吟稿卷二

明 汪廣洋 撰

七言古體

過義烏拜顏孝子祠

名烏
秦人

顏孝子爾雖生不過時死有可模
羸秦虎視吞八區阿
房作宮咸陽都築城萬里非久圖
吮民骨髓民骨枯鳳
凰不鳴賢者逋虎狼在肘羸識無
當時孝子靡所及閉
門讀書懷遠謨有親在堂垂白顛
朝食橡栗暮采茶山

空谷底誰與徒悲歌慷慨聲嗚嗚歸來堂上親已殂白
日慘淡天糝糊捫心向天哭不蘇愁雲在樹棺在途對
面非朋友側身寡妻孀出門暴風吹裂膚哀哀求人誰
肯徂人不汝從從者烏烏傷烏傷日就晡繼之以血將
其雛以喙助土不告痛至今故塚生春蕪嗟嗟顏孝子
特立太華孤秦日苦短不可扶王風斷喪世道汙衣冠
毀裂淪泥塗君父視之如豸芻荒涼古廟森雙梧飢鴛
下啄驚愁狐何人為子陳清酤我今下馬拜義烏義烏

義烏空萬夫

題孫植所畫馬圖為德明何叅政賦

烟氛四塞山河裂海內人心望昭晰赤龍飛渡東南來
摩盪乾坤開日月當時際會乘風雲左之右之皆駿犇
騏驪寧數月氏種驪黃况是滎河孫朝蹴鯨波上荆楚
莫踏燕塵過齊魯固知逸足誇騰驤實是雄才耀竒武
將軍稟賦雄武姿攀鱗每獨爭先馳十年跨馬事雄戰
乃復得此龍媒竒紫絲垂韉金絡腦慣向都門踏清曉

體如足練氣如虹舉手真堪接飛鳥梨花吹雪東風香
蘭筋鳳臆森開張鏡瞳的皜瑩鉛水竹耳揮霍批秋霜
將軍歸來重追憶緩纜從容花下立故令毫素為揮灑
肯忘當初戰征日君不見長安昔數曹將軍畫馬愛畫
骨與神天閑十二總名馬意度經營殊絕倫又不見汾
陽亦有獅子花霜蹄卓鐵盤風沙潼關蜀道屢來往展
轉百戰開京華予亦平生事奇絕按圖對馬心神悅不
須更論畫者工且以汾陽為君說

五老峯

五老峯吾不知出於幾千萬載貌何古頭何童上有一
老摩太空儼然長庚貫當中傍有四老何龍鍾彷彿南
山之隱翁雲為衣天為蓋彭蠡微茫一杯大小孤大孤
鬱鬱相望五老笑談如拾芥嗟余太倉一稊米屢向峯前
弄烟水明日東遊登泰山長挹諸翁碧雲裏

歌風臺

古臺秋風吹野蒿大江直下奔驚濤塊然崛起不數仞

意氣尚欲憑雲高在昔六王戰爭已鮑魚腥祖龍死
靖函以西羣虎生豐沛之間一人起手提三尺風塵中
敢與楚霸王雌雄入關先遂父老願屈身反比臣妾同
楚霸王手勢已極漢高虛心未安席暗鳴豈是興王謀
寬厚却有回天力烏江合戰由一麾韓彭之功實在茲
後來處置稍失序毋乃大醇而小疵故鄉故鄉歸去來
槌牛醜酒臨高臺鄉中故老見天子慨想昔遊今壯哉
酒酣拔劍大風裏自舞自歌隆淮起願以猛士守四方

山川草木從風靡惜哉漢高之慮在目前於變時雍恐
未然此風徑開四百載那似周家八百年江湖小臣牛
馬走落日登臺重回首悵望長陵塵埃間還酌彭城一
杯酒

雙栢篇贈陳景仁

桐川官舍有雙栢歲久蒼髯森林立蜿蜒古幹蟠蛟龍
礪砢蝨根錯金石長風萬里海嶠來怒挾鯨濤撼虛碧
萬木已就衰百卉亦改色輾轉玄陰互開闢爾乃不受

霜雪迫使君獨好事十月南省還駐車官舍頗清暇起
坐正在雙柏間天空鶴巢雲渺渺月冷子落秋斑斑况
當桐川歲時晏農務告成官事閒默然冠帶憩晴日對
此想像緩民難豈惟耽彼樂聊復怡爾顏君不聞召公
美化行南國手撫甘棠重游息後來歌詠思不忘愛樹
真如愛其德又不聞潘岳出宰河陽城種花滿城花畫
明河陽小治亦稍輯尚有簡牘書令名君才遠抱歲寒
節逸氣孤騫凜冰雪明堂大開需棟梁引領相期繼前

轍只今兵革連四方天地蒼茫日流血朝廷求治安丞
相攬英傑君乎君乎當勉旃毋以哦松事清絕為君長
歌雙柏篇白露蕭蕭滴涼月

萬家湖

萬家湖湖水活濁浪排空噴流沫黃河不與淮河通
蓄洪濤際空濶昨日大船無好風推挽力與湖爭雄小
船尾尾蕩雙槳超如脫兔輕如鴻今朝忽喜南風作大
船中流肆騰躍小船退縮莫敢行盡向黃蘆岸西泊萬

家湖水空潏潏四顧不見隄與山但願長風不驚浪不
惡大船小船俱往還

繁昌夾

繁昌夾繁昌夾口江流狹波濤洶洶雲冥冥蘆葦蕭蕭
風颯颯棹郎三日無北風背牽百丈行澤中前歌未斷
後歌發野烟孤沒驚飛鴻繁昌夾流深幾許繁昌人民
夾前住苦竹截篙蘆縛舟打魚燒山自成趣人生處世
何為榮一榻足以安其生但得有溪可漁有土可耕何

用出入誇肥輕君不聞五陵公子多豪舉甲第連雲燿
飛翥朝聞鼉鼓擊春風暮見彤扉鎖秋雨

山有湫

山有湫雲翥鬱風颭颭乃在章貢之陽崆峒之幽湫波
氷浸石骨底陰森樹木相綢繆上有千丈之翠壁下有
百尺之蒼虬神奇鬼怪變恍惚驅逐雷雨無停留今年
五六月稻禾乾欲死嗻嗻章貢民束手坐待斃嗟哉兵
困餘何以復如此山湫有靈聽我言爾虬宅茲久蜿蜒

安危同境憂樂然寧不一出為我民周旋坐令膏澤遍
四海力挽凶歲成豐年山有漱生雲烟

珠湖篇

在高郵西亦名甓社中有珠夜現

湖光倒浸玻璃冷湖水瀾漫幾千頃中有峯頭玉井蓮
靚理凝粧照秋影湖邊老翁塵外仙鶴髮蕭蕭垂滿肩
手扶蘭槳暫容與為我拊髀陳當年當年四海無虞日
桴鼓不鳴風浪息老蚌啣珠高射天夜夜寒芒耀奎壁
奎壁聯輝清夜長美人亭上掬珠光春秋一經究終始

重在黜霸先尊王江淮風俗近淳古米穀年豐賤如土

驚犬何曾吠暮村多村已覺登天府

孫莘老湖上構玩珠亭夜對珠光讀

書與弟覽皆登科註春秋行於世

後來明珠歸海東野鷗搖蕩月朦朧

畫船盡日載歌舞滿眼嬌雲花鬪紅嬌雲滿眼觀不足

綠柳新蒲戲雙玉公子新裁描繡衣館娃學寫連珠曲

曲譜漸繁愁漸多夕陽流水竟如何一朝萬事隨轉燭

伐鼓鳴鉦戰艦過戰艦飛來截湖水綵幟牙檣半空起

列郡摧殘灰燼餘生民痛死溝壑裏老翁既言長嘆嗟

側身搖望日西斜殺氣憑陵氛翳合散為愁雲東向遮
我聞老翁如此語暫爾停舟坐修渚聖人有作朝明堂
五日一風十日雨古來治亂信有時天運豈以人力為
終見明珠出海底致彼俗尚還熙熙翁聞我言不肯住
浪採蘋花入雲去回看天地兩茫茫歎乃酣歌隔烟樹

題滄洲圖

南宮校里東吳客手把滄洲畫盈尺相逢江左求我歌
我豈深知畫無敵但憶昔人臨畫時彷彿畫日凝神思

峯巒隨意出萬仞點綴到處生秋思
陰厓磅礴老樹死
怒流瀆激蒼虬悲瀟湘玄圃在眼底
石門劍閣相參差
乃知好畫不易得令我一見三嘆之
君不聞王維愛畫
入骨髓筆勢東傾九江水開元年間
數畫師維也差肩
獨竒偉後來宣和收畫圖片紙落手
千金沽輞川遺製
妙天趣識者至今稱絕無我家遠在
東湖曲朝服晴霞
飲春綠何當著我雙樹間卧聽松風
撼羣玉

凌歊臺

姑溪城北西風起臺構荒涼俯秋水美人罷粧鸞鏡塵
宮樹長年落紅紫我思宋祖行樂時五雲不盡來軒輜
錦箏銀瑟度華月碧紗翠羽生微颺當時美人坐臺上
綠水青山互相向野禽曾逐烟際來翻得叢中數聲唱
美人於今去不還白雲夜夜愁空山空山唯有石泉水
彷彿清泠鳴佩環臺前野老頭如雪但云臺構民脂血
請君當歌慷慨辭毋俾今人繼前轍

香溪渡

香溪渡頭春雨時溪風吹青楊柳枝溪頭死者苦無數
白骨纍纍知是誰舟中老人向人語此徒乃是良家子
一身去家充海軍劄若香溪渡頭水大軍萬馬西南來
赤幟白日青天開奈此縱橫肆血氣至今白骨堆青苔
君不聞聖人用兵不得已伐暴勝殘濟時起鋒鏑之下
不可容要在人心識天理

寓史相故宅用郭奎夜吟韻

金張第宅連雲樹鳳筦鶻絃語春霧尊前月落人未眠

門外烏啼天欲曙秋風蕭蕭吹客衣堂上主人胡不歸
雕垣粉剝野鼠竄夾道草深官馬稀嗚呼蜉蝣朝生悲
暮死荆卿長歌手挾七鹿門乃有龐德公白頭採芝近
鄉里

題僧巨然層嵐春霽圖

表一無滄海客瀛洲仙貌如秋鶴照野田手持層嵐春
霽圖云出畫師僧巨然筆蹤茫昧不可識但見粉墨剝
落生雲烟青鞋布襪者誰子一琴一鶴相後先山中酒

熟鳴夜泉碧桃流水春風前朗吟一醉三千年不知何
處有此景興來欲放西津船與君笑傲金焦巔與君笑
傲金焦巔

題卜子敬所畫脩竹軒圖為夏仲南賦

道人家在南山巔長日罷讀秋水篇邇來種竹不數本
稍覺窓戶生雲烟龍稍交交翠欲舉恍疑泊近湘江渚
鸞鳳翻影雲背來高處風驚夜深語東湖隱者亦好歌
手把綠玉披紫荷清晨梳頭踏曙色到此徒倚聆秋珂

卜君之畫迥不俗卜君之容美如玉明朝擬買好東絹
請君寫我貧蒿谷

幽遠亭

曲陽城外佳林苑翠竹蒼松夾清淺誅茆飛構凌宵冥
佇目幽觀極深遠李侯伯仲神仙人棣花輝映蘭玉春
當時起坐此亭上揮灑翰墨成天真一別流光去如水
亭榭荒涼日傾圮松楸偃蹇雙墓間狐兔縱橫夕陽裏
邇來感慨江之東白雲知子來秋空神悽意愴思莫極

為把濁酒臨北風

田將軍

田將軍爾能武爾能文年未三十思致君丹衷耿耿貫
白日逸氣矯矯橫秋雲雕弧二石不足挽有如驂騑一
出空其羣我歌將軍行將軍聽我歌漢家名將二十八
寇恂至今德者多寇恂獨何為愛民不忍吃遂令河內
安以德不以力後來論功數晉陽文武劍佩參翺翔將
軍無乃踵其事異日何慚輔漢唐

過通許

乙未年廣西軍戰敗於此
迨今人馬朽骨迷滿堤岸

廣西少年輕學文學武游遠從北軍檄書催渡蔡河水
廣西少年同日死黃沙滂滂河水渾髑髏鎖血埋腥魂
惟有當時戰殘鐵夜夜寒芒燭華月

梁山磯

東梁山西梁山兩山倚角江之灣江流到山勢轉東銀
潢直瀉當天關蛟龍宅其幽鷹隼巢其間沈雄詎能測
峭拔難為板旭日洞射青紅殷秋風刮地吹狂濶擊舟

上溯力愈艱長篙脫手退即易巨纜曲脊行何難使人
髮可化為白臂莫可以翰烟霏林冥冥石磴泥盤盤悒
鬱坐此長悲嘆山邊老翁如石頑懸厓插木坐碧管釣
絲萬丈墜波底問我西去何當還勸我且艤舟稍為半
日留討論身外事拂拭心上愁向夜風雨磯上頭夔巴
有客過我游請言蜀道險外此非所憂蜀山之高高不
可與侔青天相去不盈尺猿獼夜號蛇倒洄蜀江之深
深不可冥搜陽侯譁浪騎黃牛白帝來時駟蒼虬人生

母乃困羈絆到此亦復從所由世間夷險本一致我心
坦坦成安流我心坦坦成安流俛首謝翁言銘刻在肝
肺遲明采蘭葉中流漾晴霽回望梁山磯烟深兩眉翠

戲馬臺

咸陽宮中驚走鹿海內豪強起爭逐高才疾足誰得之
楚霸垂涎几上肉彭城南面高高臺吐氣揚眉躍馬來
攬轡翻疑迸星電據鞍了不動塵埃行人側目高臺路
底信君王戲馳騫寧知酷意事鞭箠要取乾坤歸獨步

憶昨馳向鴻門中張樂左邀隆準翁凡馬誰令俱辟易
真龍天寶啟英雄項莊拔劍當筵喜百二山河酒杯裏
馬知旁有樊將軍怒髮衝冠壯心起翩然得勢騰蒼鷹
坐使鸚鵡笑不鷹手中玉斗碎如雪帳底貌貅冷若冰
事機一去竟莫舉盖世拔山皆謬語虞姬痛別難再逢
烏騅欲逝從何許老我平生懷古心觸目興嗟愛遠臨
西遊七澤雲夢水東踐三齊泰華岑北來獨立高臺上
范增之墳屹相向黃河到海不復清此意令人絕悲愴

珠湖隱者篇

李白醉著宮錦袍倒騎長鯨鞭怒濤笑歌濯足九江水
睥睨萬象輕鴻毛先生早已避名譽遠棹孤舟弄雲去
夜深手把明月光更訪龍圖讀書處

趙仲穆山水圖為郎中董君美賦

吳興山水稱奇絕欲往見之不可得山如游龍水如練
寤寐神交久相識去年東征震澤歸偶向吳興泛夕暉
浮玉山前酒初熟碧浪湖中魚正肥徑從買魚酌白酒

短篷繫在滄洲柳看山飲水無了期雪花飛來大如手
山蒼蒼雲茫茫別去懷思山水長今年觸熱上齊魯直
駕天風辭豫章江湖蛟鼉宅淮蔡魚龍鄉黃河下瀉神
激揚一息泰山青在望比來宴坐觀清濟却憶雄飛數
千里東掖郎官尤好奇酌我春風紫微底手提名畫山
水圖派出吳興松雪裏求我試作山水歌為我素知山
水美展圖累日怡心神水綠山青太逼真聯鑣二子謾
馳騁我亦況是丹青人吳興書法妙天下筆意尋常寓

圖畫一水一山蟠籀文裴迪來時絕驚訝君不見司馬
遷生平足跡半山川主經奴史走百氏迴得山川一氣
先愧我長年事奔走耿耿胸中復何有雕蟲刻楮殊未
工默對江山玩星斗

捕魚圖為蕭楚芳賦

落花溶溶江水春江上好山如故人兩髯跼蹐事辛苦
舉網截江遮巨鱗容儀頗亦類古雅匪特臨流羨漁者
天機妙發毫素間畫師豈是無心寫一髯長操百尺竿

一髯屹立當風湍後先指示若為語得失所繫何其難
綠髮小兒殊不癡解帶默默臨清漪偶然一飲坐樹下
鱸鮓有無初不期君不見任公子沉沉揚州弄雲水六
鰲駕出海上來未必竿頭能致此又不見張志和嘯歌
紫芝坐綠莎一絲風月亘終古眼底屑屑浮雲過覽君
此圖動深省世間萬事魚戲鼎唯有渭川姜子牙直釣
下釣蒼波冷

登會盟臺

金戈四塞烟塵裏游說縱橫日
蟄起喜則連和怒則攻
瑣瑣會盟何足齒澠池城西
百尺臺落落瀟瀟吹草萊
白頭父老走相告此處秦王
會趙來往年譎易連城壁
已憾當初留未得一朝又約
西河地勢欲平吞弱強敵
秦王虎視函谷東海內諸侯
皆向風邯鄲伊邇彈丸地
秦擬取之猶殼中趙家賴有
相如在肯與惠文增氣槩
左右侍立如堵墻張目叱之
如芥藩秦王倚酒何見欺
豈以聲音趙所知轉柱撥絃
未終曲抽毫伸紙已多時

相如一顧聞秦樂瓦缶高擎侑王勺請王一擊為趙王
頸血濺王心不忤酒闌會罷當澠池兩國陳兵目送之
後來登臺念遺事慟及西周王道衰我思趙璧非為寶
相如病後廉頗老季世焉知用郭開反手邯鄲跡如掃

班枝花曲

班枝花光韡曄照耀交州二三月交州人家花滿城滿
城花開未抽葉焜煌隔水散雲彩翠懸綠空張錦纈信
非韓郎丹染根恐是杜宇啼成血啼成血著樹枝點綴

穠芳也自竒嶺南到處足種此嶺北居人稀見之穠芳
曉落花時雨東家西家具難黍當門笑拾瑪瑙鍾持向
城南踏春去交州地暖春歸早一夕東風為誰老翠苞
半拆漸吐綿雪花填滿行人道越娃攜筐爭采綿采綿
盈筐勝萬錢搓就瓊簪膩如蠶絲成冰縷細如烟細如
烟千萬縷綿綿到底知幾許的的燈煤夜結花軋軋機
聲暗相語停梭掩袂那得眠吉貝相將下機杼并刀裁
剪秋江雲與郎為衣白且新鄉社年豐載春酒郎試新

衣賽海神從今只種班枝樹開花結子兩成趣勸郎切
莫種垂楊引惹長條繫愁緒

題僧巨然長江萬里圖

老禪好畫如好禪不到覺悟不肯息一朝縱筆恣揮洒
萬里長江落胸臆我聞大江之水出岷山漢江之水出
嶓冢兩江合流東向趨霧滃雲蒸變俄頃此圖乃獨見
源委豈與尋常畫師比地形筆勢俱兩全白壁黃金謾
堆几又聞瞿塘之險天下無江水倒瀉山糝糊烏石灘

高浪濤急白帝城荒古木疎枯藤挂壁下獷狽苦竹綠
江啼鷓鴣展圖不得一見此令我扼腕長嗟吁世間好
畫豈易得討論應須待裴迪欲追太史賦遠遊直上峽
峩看晴碧

從軍樂

從軍樂右插忘歸左繁弱天子有詔征不庭重選前鋒
掃幽朔出門萬里不足平宛駒照耀黃金絡去年鏖戰
葱嶺東今年分戍蓬婆中蓬婆城外一丈雪半夜紫駝

號北風少年忽憶慷慨事便起酌酒澆心胸酒酣耳熱
聲摩空手舞三尺青芙蓉前將軍右都護壯士在禁不
在富一朝手格樓蘭歸人擁都門看馳騫朝承恩暮承
顧出入三軍稱獨步都門富兒空萬數人生豈被從軍
誤

楊白花

楊白花爾何白蕩漾春心易南北美人深宮愁捧心擊
碎珊瑚為誰惜大江東流烟霧深欲往從之思如織

涉江采荷花

郎騎白馬臨江滸
妾采荷花涉江浦
郎情若比藕絲長
妾心勝似蓮心苦
藕絲長難縮
結蓮心苦莫如妾
天長地久此心存
花落花開任情絕

長歌行

貧不干升斗粟
富不欲方丈殮
古來窮達等細事
何用屑屑推心肝
萬金鑄寶劍
千金買雕鞍
出門得意青雲
端五花照耀春雪乾
石家金谷果何在
落花衰草秋漫漫

漫君不見長安市上李謫仙
十千取酒醉即眠有時長
歌動八極往往鼓吹三百篇
一朝掉臂滄江前眼底富
貴浮雲然眼底富貴浮雲然

哀蛩吟

西風院落無人語
白露泠泠滴秋宇
仰見明月河漢高
唧軋哀蛩弄機杼
唧軋唧軋機杼鳴
綺窻飛度玉梭輕
同聲合奏思無限
萬緒千端織不成
芳蘭夕氣浮金井
寶鴨沉烟翠衿冷
蕩子從軍去不歸
妾身抱恨愁孤影

此時此夜聞此聲更長夢短難為情銀缸暗擊玉釵碎
錦瑟斜移金鴈橫金鴈斜橫飛不起漫索餘音滿人耳
梨雲化作陽臺夢家書望絕湘江鯉湘江水流東復深
蕩子不歸勞妾心故將鮫人萬斛淚寫入哀虫腸斷吟

狂歌行為葉宗海賦

西礪生文中虎入中龍身披紫雲口生虹九江秀色剪
瞳子出門一笑天為風十五即汗漫壯遊滄海東仰超
鴻濛凌太空俯拾雲夢吞心胸似非隴西之長吉何以

結交皆巨公我才况是燕臺客深托黃金鑄龍骨長風
吹來天際游與君相逢若相識君方解以狐白裘質以
銀驄馬得錢即沽趙州酒挽起明河一傾瀉醉呼平原
君大酌花樹下瑤枝接香熏羽衣碧寶盤流接杯竿君
先舞我當歌天為幙雲相和金壘倒挹春浩蕩玉冠倒
挂冰嗟我滌陽小兒走驚笑笑我與君將為何將為何
誰知音白雲忽來知我心不見山公後習家池草深此
翁放浪有真意大道汗隆無古今罷歌回舞思莫極一

鶴飛下瑯琊岑

四禽言

不如歸去游子天涯斷腸處
瞿塘峽口風浪喧祈連山
頭冰雪聚不如歸去

提葫蘆沽美酒富貴於人復何有
人生行樂不及時坐
見朱顏成白首提葫蘆沽美酒

蠶老乏婦舍北舍南春已暮
小麥漸漸大麥黃綠車挂
壁塵生釜蠶老乏婦

行不得也哥哥巫山路遙湘水多桂樹叢幽啼虎豹桃
花浪濶喧蛟鼉行不得也哥哥

江陰老人謠贈吳指揮

江陰城中頭白翁面皺腰曲雙耳聾手扶竹杖官道側
向人欲語捫心胸自言往昔承平日老夫城中家富實
一從淝右干戈興官稅民差日繁劇大兒從戎行小兒
當賦役縱有老夫存連年避兵革元戎既退海寇來江
陰城中生綠苔人心洶洶樂變易殺人何異除蒿萊去

年自逢兵總兵與民為主民獲生官軍不擾民樂耕大
開濠塹堅築城老夫甘分守困寡不忘作詩詒太平

農家樂示寧國縣官

農家樂農家有田負城郭枯桑回青楊柳黃手把犁鋤
事東作城中近有能長官官稅民徭務從薄吾農但願
風雨時打鼓催耕轉村落千倉萬倉輸到官躋彼公堂
獻康爵三冬閉門喫飽飯誰入得似農家樂

憎王孫

王孫爾為何代客陵谷變遷歸不得衣冠毀裂不似人
放浪形骸恣飄忽春山高高春樹蒼爾乃結黨成跳跟
山下有田多百穀爾復蹂踐不得將喧呼萬狀絕可惡
見人褻狎乃所長我獨嗟爾類不如狗與彘狗彘猶能
依附人爾何為乎自輕棄


野禽鳴

告天兒何獨悲脊令原上春風吹雄雌頽頽羽襍褻路
旁行人愁見之蒼然掀起數百丈以聲叩天將為誰其

音嘈嘈其尾佳佳喉乾口燥無了期使人聽之心膽摧
中原板蕩十餘載五兵血戰三精虧黃沙漫漫草離離
髑髏如霜骨如雪彼蒼高高知不知匪風下泉感於斯
念汝微物知安危告天免何獨悲

啄木

啄木啄木爾何為乎碌碌朝飛茂林夕飛叢麓倚利觜
而斧堅索虫蝻以充腹其役何勞其得何足秋風烟隴
嘉禾熟胡不從之啄金粟



次定句草全書

鳳池吟稿

三三

鳳池吟稿卷二

欽定四庫全書

集部

鳳池吟稿卷六

三至

詳校官中書臣呂光復

中書臣劉源溥覆勘

總校官中書臣朱鈐

校對官中書臣牛稔文

騰錄監生臣沈世玫

欽定四庫全書

鳳池吟稿卷三

明 汪廣洋 撰

五言長律

淞右苗帥率獠獠來歸右司王愷往慰之因其
回作詩以贈

昭代垂洪業皇風被遠人三苗馴禮化五嶺淨烽塵況
值來歸際宜加撫慰諄茲行闕國政重選得儒臣陸賈
魯通越張儀每到秦祇應談寸舌孰與布深仁羽檄通

宵下星麾介曉陳
冒雲扳石磴
乘月渡溪津
崖氣沾衣濕
藤枝刺眼新
野人爭共看
屬吏候相親
遠道經踰月
遐征未決旬
只今全補報
曷敢後艱辛
外閫趨迎久
初筵禮數頻
片言垂懇懇
百諾進循循
上日回丹旆
高秋擁畫輪
麒麟驚過電
搖撻集懸鷄
歸拜彤庭曉
徐回玉殿春
啟居親顧問
獻納賴諮詢
將命功堪賦
來宣事絕倫
為君歌雅頌
想像畫麒麟

贈孫炎

拜命趨侯府持書出省曹官遊千里外公論一時高
曉日鳴珂珮晴天簇羽旄暫為東楚別且醉太平阜
祖席陳麟脯賓筵集鳳毛清歌來窈窕名酒挹葡
萄好奮雲中鵠須持海上鰲贈言良在耳極意對
揮毫野色薰青草瀾光灑碧桃徘徊瞻鵲喜彷彿
及蠶繅疇昔成戎服陪行擁戰艘每同登虎帳恒
得進龍韜况復膺新寵休云任獨勞漢廷思賈誼
晉室望山濤多事煩經濟羣情慰鬱陶撫摩深見
托佐理未為叨周道期回轍強弓擬

載橐豺狼終見化蜂蠆亦何逃陋巷騰歡笑交衢絕慟
號九華應遠待飛翠照恩袍

送蔡元善之官銅陵

白面黃華使朱衣紫府仙儀容追典雅進退合周旋捧
檄長觀國宣威每到邊風塵雙鬢底江漢一帆前上相
憐多藝諸公念獨賢銅陵開舊治玉案喜新遷拜命兼
恩寵躬行在勉旃好板潘岳駕莫後祖生鞭旦日催鳴
珮春華簇舞筵從來枳棘地鸞鳳豈留連

豫章南樓

適意緣清景馳思屬早秋
眷馬臨勝地暫爾憩南樓
楚岫雲中出章江樹杪流
涼蟬汎聲響細草沒歸愁
鼓角三邊壯襜帷五月留
誰知放歌者脉脉寄滄洲

鳳池吟稿卷三

欽定四庫全書

鳳池吟稿卷四

明 汪廣洋 撰

五言律詩

月夜登豫章南樓

酷熱不可敵，起登江上樓。
焚香就華月，撥琴彈素秋。
高梧宿鳥下，芳蕙夕螢流。
覽物感時序，清笳發暝愁。

九日

長劍客千里，一杯歌七哀。
晚節忽已至，秋芳殊未開。
平

沙誰戲馬落日自登臺西北天垂遠滄江聞鴈來

寄孔博士

疇昔同趨名雞鳴候啟扉聯章門下進並馬月中歸掖
樹啼烏早風花委路微相望隔千里目斷楚雲飛

寄西掖諸友

玉簫吹鳳凰闕月寫滄浪故國幾時到高樓今夜長候
虫啼露壁涼葉下銀牀無限懷人意裁詩遠寄將

忠勤樓諸老夜直余時守省作詩寄之

西掖延秋爽高樓倚太清玉繩當坐轉銀漢近人明上
相思經濟諸公任老成不知前席夜曾語及蒼生

晝省夜不寤起行雙樹間遙聞唳孤鶴清響曾落空山涼
露徐徐下秋雲故故還從來事幽覽頗與意相關

耿耿衆星白漫漫長夜寒萬方猶事武一榻豈容安零
露沾琴席高梧下井闌永懷何以托詩罷動倚蘭

露坐

愁極覺宵永坐深知露涼遣時聊命酒愛月屢移牀北

斗回杓近高城下漏長用非疏附者撫事即蒼茫

小孤山

海門第一關蒼翠五雲間陰雨蛟龍出晴天鶴鶴還江
聲春夜寂草色帶春殷欲往臨危頂因之望故山

月夜同諸友酌

休撥紫檀槽且傾黃濁醪涼天兼得月我輩復持螯彭
蠡一杯大匡廬半壁高竹林瀟灑地應有醉山濤

登徐孺子亭

高士不可得，茲亭幸爾留。
偶來當暇日，況復及清秋。
湖水當門落，松雲傍枕浮。
幾時閒歷覽，乘月放扁舟。

晚晴江上

江水鴨頭綠，楚山螺髻青。
鷓鴣啼不盡，花發樹冥冥。
微風汎蘭葉，落日過松亭。
勝境思彌愜，漁歌隨處聽。

西掖聞鶯

粉署春已晚，黃鸝時復鳴。
落花蕩輕吹，繁木翳新晴。
好語多聯續，餘音入紫清。
鳳池上客一曲送新聲。

清風亭對酒

二月雨中盡一尊
亭下開青山望不極
白雲招可來啼
鳥合芳樹落花委
蒼苔遙知舊游者
歌詠鳳凰臺

寄陳僉事

露白團秋草天涼悲
晚蛩懷人當永夜
看月上疎桐邊
候烽傳息畬田歲
喜豐了知巡歷罷
僕引歸驄

秋日憶故園

素得故園趣遠如南澗
阿衆芳時既集啼鳥秋
復多對

竹不及晦酌酒屢當歌去鄉僅十載懷之可奈何

郡齋秋日

惟幙公事簡齋居文墨閒開簾坐白日拄笏對青山
謬拙占微官疎慵覺厚顏空令懷舊業心逐鳥飛還

歸畊叟

軒冕若為累田園信可耕寧知靜者意不類曠達情
過江逢雨歇穿林聞鳥鳴得酒亦復醉陶然終此生

秋樹

牆頭兩好樹翠碧積陰陰落日風濤起滿庭秋意深繁
條委砌石涼葉下衣襟况有行歌者聞之亦散心

登鳳凰臺懷孫伯融

故人不可見遠懷良未開烟樹暮雲合江帆春雨來含
情望三益撫卷歌七哀聊以酒一斗攜上鳳凰臺

征婦詞

夫當戍關塞妾重事姑嫜見月驚離別裁衣欲寄將淚
先金剪落心逐蠶絲長想得倉庚語歸時日載陽

東葉滙

子獨抱遠器澹然陶至情素無圭組繫緬有林壑情園
涉愛嘉樹觴詠掇芳英余亦忘機者世紛非所嬰

宿浦江錢氏山居

宋尚書
錢通後

喬木蒼然者如君有幾家安居忘歲月適意在烟霞對
客開春酒當門掃落花萬方從戰伐全不廢生涯

四壁暮山紫千章春樹齊若人忘世故築室住岩西靜
日看雲出開簾聽鳥啼客來攜子侄隨意閱新題

贈孫伯融之官池陽

江浦晚霞明桃花春水生來攜建業酒送子池陽城臨
發贈寶劍開筵彈玉箏況當理新國珍重在斯行

夜泊臨江城下

維舟近清樾坐愛江水深飛雨忽沾席涼風吹滿林當
歌發慷慨訪舊縱登臨聊以寫綠綺因之清我心

曉經豫章城東

忽忽歲年暮感我去鄉思臨軒梳短髮緩轡過方池野

曠秋雲淡天涼露氣滋澹臺遺塚在誰與薦汪離

送樂架閣督運宣徽

江色淨如洗白門三月春愁來別知己况乃是鄉人積
雨暮雲合東風芳草新宣徽耆舊在相見重諮詢

蕭何餽餉日漢業經營時一旦見圖繪千年垂令儀因
君當遠發倚馬贈行辭預擬旋歸旆丹青滿鳳池

排悶

布衣不任事恒似涉風波况值經營際其如會計何長

官憂見罵小吏厭相過翻憶秋池上臨書換白鵝

登鳳凰臺

久游龍虎國每上鳳凰臺一水浮衣帶三山落酒杯東
南形勝在空濶畫圖開有感風雲會從天五馬來

清夜

月林栖羽白露草啼蛩清秋帶銀河瀉涼隨水簾生彈
琴送逸響酌酒散幽情賴有同袍者俱為江海行

寄省中諸老

台衡森列宿伊邇紫被垣諸老臨清地匡時在直言醴
泉方浩瀚鳳鳥任騰騫我獨南征久年來憶故園

贈李士良之官宜興

近美除州牧多言用舊臣正須宜令德毋乃為斯民沙
暖潮痕淺城春柳色新應思陽羨路日日望車塵

柬孔都事

一日不趨省寸心何以安開門偶自適力疾強如餐廣
野衆星出高城暝鼓殘思君進謁後歸騎北風寒

西施灘

東越國已泯西施灘尚存
天垂芳草地漁唱夕陽村
荇帶牽舟楫羅衣拂酒尊
杜鵑緣底事只管下啼痕

宴建德南樓

綺席張新宴華裾縱合歡
蔗漿調碧盃魚鱠縷冰盤
高閣宜開晚輕衣不受寒
坐聞彈錦瑟涼月在闌干

秋日用張都事游田墳詩韻

命駕來游日看碑數歷年
紺雲籠淨刹碧草上遺阡
野

興三山外秋聲萬竹邊
應逢大小朗煮茗試新泉

登蔣山望江亭次韻二首

絕頂出華構有時來一登
曾將六朝事閑問百年僧
寓目誠多感投身愧未能
暫留林下夕江浦散漁燈

每到蔣山日令人老眼青
溜泉深處落獨客靜中聽
蘿徑依禪榻苔函鎖佛經
更須臨絕頂一上望江亭

九日答郭生詩韻

眺望思彌愜况當秋序殫
微烟澹遙水落日下平巒
每

喜疎花發得逢知己謹壺觴且清話聊樂復何歎

送院判俞子茂進兵番陽

江東風日晴把酒送君行好慰三千士將收七十城
烟花催疊鼓雲騎擁連營山越人爭喜殊方自此清

和主敬陶員外詩韻

相國深圖治郎官早見親每膺前席夜曾屬後車塵
種竹思儀鳳將書究獲麟憂時生白髮迥比向來新

贈歷陽令

縣宰張公子能官且好文擬將清白節報答聖明君撫
卷歌秋水揚舫帶夕曛雞山何處是西望碧網溫

豫章秋日聞鶯

杞樹葉半脫不禁黃鳥啼興闌綠夢斷愁盡覺聲低南
浦涼雲薄章江碧草萋終非舊聞處花發鳳池西

贈卜明府

聯轡出東野長歌贈貳車要知勤庶績方不負新除好
日開春酒晴江上白魚明當有嘉政取次為君書

送李員外往臨川議事

四牡動鳴鑣，雙旌擁使軺。
省郎臨政日，郡吏候來朝。
送別當秋野，行吟過浦橋。
煩將經國事，細語霍嫖姚。

贈周卿往臨江

秋風動庭闈，游子賦無衣。
謾托青雲想，空令白日飛。
江流來浩蕩，樹色帶依微。
西郡多朋達，停驂候遠歸。

奉旨詠五明馬

九尺風神異，五花春色明。
璠璣裝絡腦，珠貝結繁纓。
霧

滿來天迢星馳過石城千金逢伯樂一顧未為輕

答友人夜直詩韻

碧樹秋聲滿彤庭月色高故人待清漏永夜直東曹聽
履鳴瑤珮飛觴看寶刀猶能臨素壁和霧點霜毫

野興

野興自不淺秋聲何復來樹深寒易作門僻曉慵開擬
寫江掩恨慚非宋玉才素琴多雅調稍理向池臺

鳳池吟稿卷四

欽定四庫全書

鳳池吟稿卷五

明 汪廣洋 撰

五言律詩

合江亭晚眺

二水澄白練，一亭延素秋。
聊為庾公嘯，因效子長遊。
月色瀉尊俎，劍光衝斗牛。
更須舒老眼，西北有高樓。

月夜

默坐百感集，高城初漏過。
起行明月底，靜看落葉多。
多候

蟲啼砌石涼蛤沸池波懷抱無由寫其如此夜何

七夕

七夕無盈刻雙星有定期明河徵素色靈鵲待多時
簾幙清歌度果擘結綺垂嫩人新月底拜語向蛛絲

贈友生

幙府求才俊髯參早見招春江懷解纜秋日喜聯鑣
白紵辭偏好青雲路正遙十年戎馬內老氣逸天驕

與子十年故去鄉千里遙艱難悲晉楚慷慨薄雲霄起

舞月光出長歌露氣飄
秋風玉關外曾是老班超

賦江上停雲送周生省親

落日敞朱樓江雲暝不流
密依荆樹暗遙帶晉陵秋
鳥外生歸思天涯念舊遊
亦知親舍近早晚放孤舟

寄崔元初

晴軒種竹罷好月到窓時
坐我長松下歌君流水詩
墓田歸野雀踈雨落山葵
偶值南來使殷勤寄所思

送高廷琇之揚州

君家賢伯仲理權上揚州一別懸知遠幾時還共遊暮
雲生楚樹涼雨過和溝後夜遙相憶月高人倚樓

贈李府尹

太守承新澤諸公贈好辭近聞初度日正值上官時園
棣聯春萼庭梧長玉枝比來歌二美聊以慰相思

送州判劉秩之徐州

彭城必爭地兵後竟如何庶事煩經畧羣情在撫摩江
雲垂暝遠楚樹入秋多感慨臨岐別持觴發嘯歌

題凝翠軒

都會稱江左山川勝洛中小軒開靜日積翠倚晴空雲
卧巢松鶴泉流飲澗虹公餘宜引眺秀色在心胸

學靜齋為鎮撫易貴賦

唯我習靜者登君學靜齋竹陰籠小徑草色上閑階默
對芳春景漸消遠客懷吟餘清興愜鳴鳥更啾啾

交州南樓

久負烟霞想多為汗漫遊誰知嶺外客獨上斗南樓碧

樹巖蠻邏清歌發
蜚舟西山餘爽氣
早晚是新秋

嶺南新秋

繁吹動秋聲
天涼海氣清
深杯行竹葉
高枕傲桃笙
晚樹依微出
晴波潑灩明
醉來還自得
覺我在蓬瀛

嶺南道中

過盡梅關路
灘行喜順流
滄江元到海
橫石不容輒
嶺樹垂紅果
汀沙聚白鷗
從來交廣地
還是古揚州

春日聞鶯

旭日麗寶樹微風生綺羅竹深涼翠合鶯轉落紅多岑
寂懷人處間闌奈爾何嶺南天氣好二月轉清和

題方塘

輕烟浮野色淺綠動秋渠好鳥時飛至令人心自如
花紅日淨夢草碧窻虛更有於中趣閑來學釣魚

喜友得除

拜命榮何極來旬事絕難中天移列宿西郡得能官
露重蘭蕤碧風高柏子寒思君舊遊地誰與更盤桓

中秋對雨

百年多勝遊得意在中秋月白露華滿天空海氣浮深
杯行綠酒短棹發滄州此夜兼風雨令人有所愁

訪劉外史題詩見山堂兼美同行諸友

闕二字

劉外史今代蔡中郎結屋緣溪曲開軒待月光竹
圍琴席潤花傍酒船香見說波南去何時有報章

醞藉稽中散才名阮仲容良時不易得有暇即相從溪
靜魚依藻天涼鶴在松坐開金谷酒酌向寶珠峯

喜平蘇州兼得家書二首

五年煩睿思萬國繫安危
訓武修文日擒充戮實時卿
雲垂爛漫彩鳳下歲蕤更喜河南北壺漿待六師

京國書來報蘇州事已完
慈親膺壽考諸弟喜平安
稽首瞻天舞焚香對日觀
聖恩何以答銘刻在忠肝

看山

沿江多好山孤絕勢難扳
鷹隼飛騰上雲霞出沒間
崖巔摩太古石脚浸蒼頑
東下連滄海如渠有幾關

夜過落星石

今夕興不淺，月高湖水平。
穩乘白鷁子，直到豫章城。
山酒開孤寂，洞簫聞數聲。
匡廬青未了，相近眼偏明。

過昌邑山

解帶臨江渚，移舟近薜蘿。
岸沙留醉卧，山鳥答行歌。
浪靜天容濶，雲低雨脚多。
年年事行役，此地屢經過。

青山

獨立眺空明，夜涼河漢橫。
林疎容月色，溪靜納泉聲。
興

到詩堪詠愁寬酒易傾徘徊山露下雲水有餘情

再過西省

雲集欵芳渚星言送去輶敢煩君命重不憚宦途遙故
邑將期到西山復見招簿書如易就當別在明朝

白髮

聖朝頻見取報效近如何名廁清時列憂深白髮多江
淮移省檄鄒魯尚絃歌自愧才疎淺那能遂撫摩

長夏

涼挹溪山爽，翬飛省署新。
鶯聲清過耳，草色綠愁人。
濁酒傳杯重，烏絲界紙勻。
吾儒公事畢，聊復暫怡神。

得杭州從侄壁書

自我離鄉井，于今十六年。
汝親罹喪亂，諸叔困顛連。
痛哭春江樹，將書暮雨前。
幾時攜汝輩，歸種水西田。

風雪大作子敬真酒喜朱伯徽尋魯志敏回

天寒棲鳥定，野濶暮雲多。
奈可山城寂，其如風雪何。
感時將白髮，處世尚彤戈。
賴有王都督，徐徐動雅歌。

凍雪迷山屐寒風襲毳袍
干戈猶未弭吾輩豈辭勞
大字傳飛檄深杯送濁醪
老懷殊自喜早晚問包茅

題玄同子卷贈考功葛元德

吾愛玄同子鬚眉冰雪清
一言辭職去九轉煉丹成
句曲陶弘景洛陽竇子明
相望隔千里松鶴倍增榮

憶建業

江城秋宴日公館雨來時
縱得陶潛酒難澆宋玉悲
浦雲寒易濕汀草曠先知
何以長干道悠悠我所思

得風

拜命趨歸日沿流喜順風
雨帆皆得意直下大江東
神物潛幽宅靈妃啟閔宮
嘯歌橫短檝歷覽氣何雄

馬當山

江畔山無數馬當青出羣
坡陀揜急水盤礴抗浮雲
怪木懸春雨幽花麗夕曛
緬思開闢際光岳肇初分

京口

江水白如練楚山青可人
晴光生北固暮雨隔西津
雲

霧帆檣合金銀殿閣新
眷茲天塹險直與海為隣

揚州

憶昔曾遊地于今有幾家
濕雲纏戍鼓高柳聚城鴉
玄鶴去無跡綠蕪愁更賒
盈盈江上月何處照瓊花

淮安

薄宦遊齊魯去鄉知幾千
東流淮水急直下楚城連
濁浪橫衝海斜陽半在船
我為官府繫長是涉風烟

洪澤屯

兵農古為一耕戰兩無妨重在人經理終期國富强服
勤遵往轍較藝得遺方灌溉尤多利雲山白水長

過泗州盱眙

泗水開名郡盱眙擁大山雲林與城郭都在畫圖間淮
楚鍾靈異烟霞恣往還從來形勝地造化默相關

神女山

又名玉環山

神女去云遠名山依舊存玳環空寂寞岩壑閱晨昏雲
木深巖廟淮流直到門無因停桂楫和露挹蘭蓀

浮山

禹功疏鑿遠淮泗莫安流秀出岡巒好看來紫翠浮傳
聞仙境異軒豁洞門幽松栢蕭森處陰陰長似秋

五河縣澮汜滌沙入淮

一縣控衝要五河當合流生民逢喪亂治日免需求築
地栽蔬短編茅住宅幽叮嚀單父宰慎勿事優悠

釣魚臺

溜急沙隄險張帆蕩槳過計程知遠近趨事恐蹉跎蘆

葦千層合河流百折多釣魚臺下客空憶扣舷歌

夜分

好雨滌煩暑夜分渾是秋沙明疑見雪月上可行舟涼
氣侵床榻清風入柁樓澆花村裏客只合住滄州

過潁州廢境

倡亂伊誰始頻年戰未休風雲隨變態淮水尚安流綠
野彌荆棘黃沙慘髑髏移舟暫臨眺掩涕不勝憂

寓興

落日一樽酒壯歌淮蔡間
停杯愛雲水解帶對溪山野
曠月初出鳥鳴心自閒
稍晴湍瀨急百丈費躋攀

陳州

淮蔡奠平野桑麻翳夕陰
土風仍自古城郭尚於今
世亂人家少年饑草澤深
適當開創始綏撫在經心

離汴京渡口

衮衮天河水雄奔際海涯
一官辭帝闕六月上星槎
平地俄興浪中流忽湧沙
瞿塘與巫峽神變不須誇

黃陵岡

元尚書賈魯
塞河之處

坤寧信足美河決豈為常重在修宸德方能合彼蒼波
濤來洶湧畚鍤謾隄防感嘆秋風客蕭蕭愁白楊

曹州

河北生靈苦曹州最可哀兵興多在難水溢屢為災蒿
草侵城合狐狸上塚來傷心寥落地一顧一徘徊

鉅野縣

廢邑開新治招來近百家未應供賦役聊可藝桑麻鄰

里更相弔悲謹覺倍加徐徐訪遺落亦復事生涯

望嘉祥山

放溜數百里悠然纔見山涼風吹雨過好鳥背人還河
水翻銀浪岡巒擁翠鬟不知幽谷底能得幾家閒

宿嘉祥縣

落日臨茲境蕭條太古初十年逢水溢一縣盡巢居地
迴魚龍盛山空草木疎渺無涯涘處何以事耕鋤

離濟寧汎舟北行

楊柳娉婷綠荷花旖旎紅魚遊華蓋底人在鑑湖中
太白拈春酒輕衣受晚風龜蒙與鳧繹只隔片雲東

鞍山泊

纔入鞍山泊河流徒覺寬晴波來浩浩空翠鬱盤盤
鷓鴣眠沙穩芙蓉挹露寒天然開勝境總在畫圖看

梁山泊

河水滔滔濶梁山奕奕雄洪流連海外巨鎮擁齊東
石洞含晴靄楊林進晚風無因躡飛屨高處望龜蒙

在省晚涼

濕熱愈熾端居念遠游
雷霆催急雨海岱入清秋
素魄雲中出微涼葉底浮
汲泉供暝酌掃地坐來幽

公餘

政劇理常簡公餘宜咏歌
移床避階草和月盼庭柯
露下緣秋重螢飛向夕多
銅池涼可掬蕭爽動蒲荷

歷下秋夕

掖垣嘉禾秀秋實何其蕃
天迴月爭彩風涼露漸繁
踈

蛩鳴唧唧驚鵲去翻翻坐久愈岑寂幽懷誰共言

秋日濟南聞鶯

簾幙捲秋晴間闕聞轉鶯柳邊迷過影花外度新聲
簧舌調來穩歌喉汎出清碧雲浮綺榭疑在錦官城

漁樵清會圖

烟渚收歸棹雲山罷采薪相逢岑寂處總是畫圖人
野蕨供芳蔌江魚得細鱗灑西村酒熟此會最情真

中秋寫懷

前年合江上去年南浦中沿流愛明月挂席任西風秫
酒酌不醉林花看更紅姮娥應笑我今夜客山東

濟南喜得家書

阿丈憐余甚家書寄八行且云添驥子還可慰護堂自
念十四載壯遊征戰場寸心無所昧出處任穹蒼

又

一心憂國事何事更關情慈母憐垂老癡兒想學行久
違甘旨奉遙隔四千程感慨秋風裏陰蛩勞夜鳴

鷗

人言海鷗白我愛海鷗閒野水際空澗溪雲帶往還素
心終自得機事不相關鷹隼獨何物騫騰狐兔間

荅張徵士韻

斗南曾獨步白下早聞名飄逸晉三謝威儀魯兩生春
杯黃秫酒野飯碧芹羹擾擾風塵者誰能得此清

贈鄧司計煥

層冰出幽壑清見古人心念子久相別知予何獨深偶

逢齊魯地共醉松栢林細把白駒詠毋為金玉音

贈張典簿璿

伯樂過冀北人言冀北空固知神駿出不與凡馬同世
路驅馳外天閑十二中從來明聖日駕馭必英雄

宿宣城山家

委曲疑無路幽深別有天偶披青嶂入得與白雲眠樹
密巢歸鳥溪迴響暗泉草堂終夜寂高枕聽鳴絃

過泰山

絕頂望神州淋漓紫翠浮天低衆山小星拱一峯秋雲
氣成龍虎嵐光蕩斗牛北恒與西華引領日東頭

雲亭山

飄飄學仙子遺跡悶空青欲往尋芝草因之采茯苓數
松晴雪在孤嶂暮雲停應是蛟龍語山靈夜出聽

大汶口

傳云大汶口秋夏水平洲一雨稍成滯衆山皆合流我
來閑飲馬誰謂不容舟無數盤陀石衝波回萬牛

嶧山

在鄒陽
縣南

言從邾子國行過嶧易山地迴烟霞古天低紫翠殷紀
城人已去遼海鶴應還聞道秦碑在顛崖老樹間

嶧州

古鄒
子國

世亂遭多難斯民苦屢遷山圍鄒子國草上漢儒阡王
事催歸日寒天逢暮年二疏遺廟在不得久周旋

滕州

自曲阜魯國至邾子國滕國薛
國山川相望不遠二百餘里

有周開列國聯絡太行東控制三邊外遨遊數日中山

川存古迹草木尚遺風予亦東之楚長歌意氣雄

梁城道中

平原遺巨壘云是古梁城樹木童童出鳩鴛帖帖鳴澄
空來急吹何處委芳英往事隨流水淒然傷我情

桃源郭外

驅車大隄上四顧多草萊嚴吹崇朝止層凌蔽岸來行
行思古道故故立荒臺滿目皆陳跡聊將濁酒開

過澠池憫旱

風沙撲面吹疲馬，厭行遲迢遞經函谷。崎嶇上灑池遺，
民遭喪亂久旱轉。流移不有甘霖降，何能脫死危。

望嵩山

鞏洛縱遊觀嵩山勢，鬱盤三呼開瀕洞。四岳壯維翰，松
偃彤霞古雲凝。紫蓋團應當作霖，雨沾足救時難。

過鼎湖得雨

南陝久旱御香
一至甘霖大降

好雨來天闕，層雲覆鼎湖。九農承厚澤，四海慰來蘇。豐
稔行將見，炎蒸坐覺無。老夫殊有喜，狂舞動三呼。

贈張主事關中講究運道回

關中兵旱久黎庶竄亡多重感朝廷德頻煩使者過舟
車資餽餉田野動謳歌寄語諸朋達遐方在撫摩

嶺南喜得家書

稽首開書札傾心想面顏一官居嶺徼萬里別鄉關最
喜慈親健都忘兩鬢斑尤聞小兒女日日望回還

登海角亭

海角固云遠人生罕見聞一亭開瀕洞四壁動塵氛月

暗魚龍伏天晴島嶼分比來舒老眼浩蕩氣凌雲

鳳池吟稿卷五